

COLUMNNA

Schoppiländ

CHATRINA JOSTY-KREUZER

Moosseedorf – la vischnanca nua che jau lavur sco scolasta è segirament enconuschenta en tut il chantun Berna. Quai era, sche ils blers na san probablamain gnanc, che l'attracziun ch'els visiteschon sa rechattà a Moosseedorf.

LA attracziun è il Shoppyland – il paradìs per far cumissions. Il Shoppyland è in paradìs tut en oransch e Moosseedorf/Schönbühl ultra da quai la sedia principala da la Migros Aare cun in grond center logistic. Per ils abitants da Moosseedorf vul quai dir, che la notg n'è mai stgira, ella è oransch ed ils camions cun il M oransch tutgan tar la culissa. Quai n'è dentant betg uschè tragic, cun quai che tut il Shoppyland ed ils magazins da la Migros èn quasi sin in'insla tranter ils vials da l'autostrada.

Cun buna vista sin l'autostrada abitescha mia collega Madleine ch'è sa disada vi da las ramurs dal traffic. Ella sa regorda mo



dad in temp cun pli pauc traffic – il lockdown la primavaira 2020.

Uschiglio è il mund anc en urden qua. Ed i tuna quasi sco in siemi socialistic: Moosseedorf ha 4100 abitants e 3800 plazzas da lavur – cunzunt pervi dal Shoppyland natiralmain.

Tut quai na save'jau betg, avant che jau hai cumenzà a lavurar qua. Tge che ha fascinà mai è la scripziun da Moosseedorf. Cun dus gidas o, s ed e. Il num deriva dal lai Moossee che tutga tar il vitg e che sa chatta – co pudessi era esser auter – gist sper l'autostrada.

Il pli lunsch davent da l'autostrada, vul dir var 1 kilometer, è la chasa da scola, sin in prà sper il gaud e gia bunamain idillic. Blers da noss scolars s'orienteschon en lur temp liber dentant plitost vers il Shoppyland.

Mintga glindesdi scrivon mes scolarets da la terza classa en in curt text tge ch'els han fatg la fin d'emna. Pleds ch'els na san betg co scriver, scriv jau vi da la tavla, uschè ch'els pon scriver giu els. «Frau Josty», dumondan els, «co scriv'ins McChicken? E Happy Meal? E McFish?»

Ditg curt: Suenter in mument stat tut la carta da menu dal McDonalds vi da nossa tavla.

Igl è cler, nua ch'els èn stads – e quest pled san els scriver senza agid: Schoppiländ!

Chatrina Josty-Kreuzer fa mintgatant cumissions en il Shoppyland a Moosseedorf. Ella abita a Köniz.